

₹ 5/

# तुबारि

www.pangi.in

अब अंग्रेजी, हिन्दी त  
पंगवाड़ी भाषा अन्तर असी।

Issue 65; 06/07/2017

## संपादकीय टीम कनारा तुबारि

मासिक पत्रिके नोयी अवतार पुठ सोबी पढ़णेबाड़ी जे बंधे। तुबारि अब सिर्फ दुई पन्ने पत्रिका न रिहा, बल्कि दुई पन्ने होरे जुड़ गे।

तुबारि संपादकीय टीम तुसी त तेन्हि सोबी के अभारी असे जेन अपु सुझाव, लेख, होर अपु विचार बेलि इस मुकाम तकर पुजाई छे असे। पढ़णे बाड़ी के कॉमेंटस बगैर तुबारि छे साल तकर चल न बटतीथ।

किस कि तुबारि अब चोउर पन्ने भोई गो असी त अपु लेख, सोच त भाषाई तरक्की करण जे सुहलियत भोई गो असी।

संपादकीय टीम दुख इस बोक पुठ असी कि पांगेई होरे जगाई केआं कोई लेख मेएण नेई लगो। हाला कि तेठियाणी बोली धिक अलग असी, तोउं बि जोउं तकर तस लिख कइ होरी के सामणी न आण्हियेल, से बोली तीं औखि त नासमझ रहेन्ती।

टीम तुं छनेयारे कती कि तुस बि कुछ लिख कइ हैं धे दिए, जेसे बेलि भाषाई तरक्की भुन्ति।

धन्यवाद



## बिषय सूची

- |                     |     |
|---------------------|-----|
| 1. सिंह राजे त बछुर | - 1 |
| 2. मेहनत करण शिचे   | - 2 |
| 3. मनता किस नऊं     | - 2 |
| 4. हैं भारते गभुर   | - 2 |
| 5. ब्याह बुछ अणबण   | - 3 |
| 6. मैं ट्यारा भाई   | - 4 |
| 7. चुटकुले          | - 4 |

## सिंह राजे त बछुर राजे कथा

यक पुराणी टेमी बोक भो कि यक जंगल अन्तर यक गोउड़ा थिआ त से सुणार थिआ। तेस जंगल अन्तर यक सिंहे राणि बी थी। से बी सुणार थी। तेन्हि दुहोड़ कुछ टेमे बाद यकेक गभुर जम्मे। जे गोउ माता थी तेसे दुध सुआ भुन्तुथ त से तेस बछुर केईया ना मुकेईतुथ। होर जे सिंहे राणी थी तेसे दुध थोड़ी घाटीयार थी। से दुहो जंगल अन्तर यक कुड बिशतेथ। दिसाई सिंहे राणी शिकार करणे घेन्तीथ त तसे गभुर तेस फाट पहाण खेलताथ। गोउ माता बि अपु बाने किंया तेस जंगल चरण जे एन्तीथ।

त तेस फाट पुटे यक रोज से अराम करण लगी त तसे चिछि बहण लगी त फाटे बड़ उन्ह्या जे दुधे धार लगण लगी, त सुसुर तेस दुआर अगर जे लगी। त से सिंहे गभुर तेस चाटते चाटते सुआद आ। गोउ माता रोज के रोज तेस फाट बठ बिशतीथ त अराम कतीथ। हर रोज तेस सिंहे गभुर दुध मेतुथ। कुछ रोजे बाद से मोटा भुआ त से तेस दुधे धार चाटते चाटते फाट पुठ चढा। तेठि से दुहे बुढि कुआ थिए। त मोटु सिंह राजे पुछु कि “ए दुध केसे भो?” गोउ माताई बोलु, “मैं भो।” तेनि तेस केआं पुछु “तेई ए दुध अपु कुआ केईया किस नेई पिवाओ?” त तेन बोलु, “जती एस जरुरत भुन्ति, ततु ए पीन्ता। पर होरु सोब मैं चिछि अन्तर रहेन्तु। अउं इस फाट पुठ एन्ती त मैं दुध अपु नुस्तु त तोउ केई पुजतु। त तु रोज के पीन्ता ना?” त सिंह राजे बोलु “आं।” त गोउ माता तेस जे बोलु, “रोज के भ्यागे इस इस टेम आई ना, त मैं दुध पीए।”




त हेउंस केईआ, तिहांणि की त तेन त बछुर राजे अपफु बछ बचबोओठ की। हेउंस केईआ बाद दुहो साते खेलतेथ, बिशतेथ। कुछ टेमे बाद से दुहो अपु अपु बन्ने किंयां दूर नशे। सिंहे राणी तेसे ई मारी छई। जिखेई से दुहे बापस अपु अपु बन्ने जे ए त बुछ बत बछुर राजे ई मारो थी। होर, सिंहे राणि तेस खाण लगो थी। बछुर राजे अपु बचवेई जे बोलु “तु डर नोउ। अउं कुछ कता। ना त तोउ बी मैं ई खाई छती।” से दुहे बचवेई यक करिगर कें गे त बोलुण लगे, “यक घंटा त यक लोहिए शंकिड़ि बणा त मैं बचवेई किंयाड़ि बहन छइ। ना त अस जंगल अन्तर होरे जे खाई छंते।” त करिगीरे तिहांणि की त से दुहे तेठिआ नठे। सिंह राजे अपु बचवेई धार कलाश ला त जेठि निलु घास त ठनु पुओणी थिउ, से तेठि बिशा। सिंह राजे तेस जे बोलु “तोउ खाण जे कोउं ऐयाल त तु उठकीण दे त मोउं तें घंटाई अवाज शुणती त अउं तें भेएइ एन्ता बा!” तोउं से नठा त यक दुई रोज तेस घंटाई कोई अवाज न शुणी त टेके रोजे सिंह राजा तेठि गा त हेरु कि बछुर राजा मज्जे जुए चरतथ त उगातथ। तेस केईया 6, 7 रोजे बाद से जिखेई मस्तीण लगा त से थोड़ु-थोड़ु उठकुण लगा त सिंह राजा फत दी कइ तेठि पुजताथ।

त तिहांणि 2,3 मेहने बाद, यक रोज तेठि कुछ मेहणु ए त से सोबी जानवरी के छोड़ कठेरण लगे। से कोई चुमार थिए। यक रोज तेन्हि बछुर राजा काआ त तेस मारणे सोचुण लगे। पर से कोठिया टाण एन्ताथ। तेन्हि से सोबी जेई बटेरण ला त सिंह राजे पता लगा। से एई गा त से सोब तेस हेर डर गे त तेन्हि सोबी केईया नशटोनाई भुई। से दुहो खुश भुए त नश गे।

शच: हैं सच्चा बचवेई से भो, जे हैं ओखि-सोखि टेम कम एन्ता।

लेखक: विनोद चौहान, 9459828290



## मेहनत करण शिचे

मेहनते बेलि हमेशा सफलता मेती,  
मेहनते बेलि धरती उपजाऊ भुन्ती,  
मेहनते बेलि किसमत चमकती,  
मेहनती मेहणु खरी इज्जत कते,  
तोउं त मेहनत करण शिचे।

मेहनते महिमा सोबी केआं न्यारी,  
मेहनते दुनिया केस न ट्यारी?  
मेहनते बेलिए प्रभुत्वा बिहार गई,  
मेहनते कमाई भुन्ती सच्चे त पक्के  
तोउं त मेहनत करण शिचे।

मेहनते जिन्दगी सच्ची जिन्दगी,  
मेहनते बगैर सोबी खेई गरीबी,  
मेहनत मेहणु मने भरती खुशी,  
मेहनते सुख भुन्ते पक्को सेउए ई मिठे,  
तोउं त मेहनत करण शिचे।

लेखक: अमित, कक्षा-पांचवी, कवास स्कूल

## मनते किस नऊं

मेहणु बोते प्यार तैं भगवान,  
बोता रेहंता, पर मनता किस नऊं।  
भुल कइ इस धरती उडरण लगो असा इन्सान,  
झडणे बि असा डर, पर मनता किस नऊं।

जिसमें अरामे लिए सुख जुटाई छओ असे,  
घर शेहर आशियाने सजाई छडे।  
पर ओइ ठेहरे आत्माई लिए।  
किछ कमऊं नऊं, किछ सजाऊं नऊं,  
जाणते सोब मगर, मनते किस नऊं..

हेरे, हर कना बनावट असी,  
मुस्कराहट खोखली भोई गो असी।  
मतलबी बण गा इन्सान।  
धर्म, ईमाने बथ छड कइ,  
गलत चुण छडी बथ, मनते किस नऊं।..

इन्सानियत देण लगो असी अवाज ,  
ऐईए! जीणे नउआ सलिखा दियुं,  
सुआ उंघ गए, सुआ गुम कइ गए।  
'इन्सानियत' बोलुण लगो असी  
'परेम' भुओ जिन्दगी,  
फि बि नदान मेहणुओ मनते किस नऊं।..  
हे जिंदेगी, अउं तैं इश्क अन्तर मर ना घियुं।

लेखिका: बबिता, चौकी

तुबारि टीमे कनारा  
सोबी पांगेई मेहणू  
थाणेई त देखेणे  
बधेए।



## खास समाचार

- इस मेहने 6 तारिख हैं मुख्यमंत्री श्री राजा वीरभद्र सिंह पांगेई अओ थिआ। तेन ठाणे शिलान्यास किया। तस केआं पता बोडा हस्ताड़े उदघाटन किया।



अपु लेख, विचार, कथा,  
कविता तुबारि अन्तर  
छपाण जे बुहन दुतो  
पता पुठ लंघाए।



## हैं भारते गभुरु

फाटी केईया बि खड़िया हौसले हैं  
दिरोई केईया बि डुघा संकल्प हैं  
ओखियार केईया बि न डरते  
मकसद पूरा कइ दम नेन्ते  
मन लाई कइ कते पढाई अस  
सोब धर्म के कते इज्जत अस  
सोबी केआं ट्यारा देश हैं  
मास्टरी के कहणा मानते  
अपफ बछ उईमी कइ बिशते  
कताबी अन्तर नियोको असा जान  
भारत देशे महान वीर बणते  
राणा प्रतापे ई धीर बणते  
बापु ई अस मेहनत करण जे घेन्ते  
भारते झण्डा फहरंते असा।

लेखिका: अरुषी, कक्षा: चौथी, स्कूल:  
कवास

## रोहतांग सुरंग

विश्व अन्तर सोभी कियां सुआ खड़िया असी रोहतांगे सुरंग। रोहतांगे सुरंग दुनीये अन्तर सोभी कीया अलग असी। रोहतांग सुरंग लगभग चौर हजार मीटर रोप बठ बणण लगो असी। ए सुरंग 8.8 किमी लमी भुं असी। उचेई हसाब जोई दुनीये अन्तर आति लमी सुरंग अभेई तकर कोठी नेइ। दुनीये अन्तर तजाकिस्थाने अजोव रोड़ी सुरंगी लमाई 5 कि मी असी। हैं देशे सोभी कियां लमी सुरंग महाराष्ट्रे रत्नगिरी जिले करवुड़े सुरंग असी, जेसे लमाई 6.5 किमी असी। यक होरी सुरंग जे 2.8 किमी लमी असी। से जम्मु कश्मीर अंतर असी। पर तोउं बि रोहतांगे सुरंग लमेई उचेई अन्तर सोभी सुरंगी बच लमी त अलग असी।

लेखक: प्रमोद ठाकुर, कवास स्कूल



## आधार कार्ड सोबी मेहणु के हक

हक की भो? हक यक 12

नमरी के संख्या भो। गभुर समेत सोभी मेहणु के पछाण भो। पता लवांतु ए सोबी मेहणु के निशाणी भो। आधार सोबी मेहणु के विशिष्ट पछाण बणाणे भो। एठि जीवसंख्यिकी या बायोमेट्रिक जाणकारी किठि भुन्ति। एसे बेलि पछाण संख्या दी छांती। भारते सोबी मेहणु के लिये सुआ खास असा त हर जगाई कम एन्ता। आधार राशन कार्ड, पासपोर्ट बणाण अन्तर त बैंकी अन्तर कम एन्ता। आधार बेलि अस केसेरी जात, धर्म, भाषाई बारे न जाण सकते। प्रमोद ठाकुर, कवासे

## हैं पता:

तुबारि पत्रिका  
हरी जरनल स्टोर, किलाइ  
बजार, किलाइ, त: पांगी  
घाटि,  
जिला: चंबा,  
हिमाचल प्रदेश।  
पिन. 176323





# ब्याह बुछ अणबण

यक मशुर कहावत असी कि “ब्याहे जोड़ी स्वर्ग अन्तर बणता, होर धरती अन्तर अस सिर्फ तस मानते”। ब्याह जपल भुन्ता त हैं मन अन्तर तीं जोश त जज्वा भुन्ता। अस अपु धाणि या जुएली खुश रखुण जे त तसे होर यक जरूरत पूरी करण जे मझिन कश बिशते। ई लगतु कि जीं हैं लखि साथि अन्तर हैं कांया घेई गो असु।

पर कुछ मेहने पता या कुछ सालुं पता हैं ब्याह अन्तर त हैं खुशी अन्तर जीं कोउं खेचरो कइ छते। अस बोकी बोकी पुठ उश्कते, मुँह फुलाई बिशते, होर झगड़िन्ते बि। यक जिल्हाणु अपु ब्याहे पेहला साल बारे बोती “अउं सोचतीथ कि ब्याहे पेहला साल सुआ मज्जेदार भुन्ता। मैं त मैं धाणि खरी दाइ गइती। पर मैं पेहला साल त जीं यक नर्के थी। बोकी बोकी पुठ उश्कुण, मन मुटाव करण, यकी होरी गलत समझुण त उदास भुण जीं हैं मुँह अन्तर बाइ दुतो थिए।” पर यक मजाकी मेहणु ई बोता, “अउं त मैं जुएली कदी झगड़िन्ते नउ; बल्कि अस कुछ खास पल यक होरी जुए काटते, जपल अस अपु अणबण, लेहर त नराजगी बारे बोक कते।”



ई कोई ब्याह नेई जेठि अणबण ना भुन्ता, मन मुटाव ना भुन्ति। पर एन्हि जुए अस कीं निपटते, तेस पुठ ई हैं ब्याहे खुशी या गम टिगता। अगर अस इन्हि बोकी पुठ सही पलाटते, त हैं ब्याह खुशी जुए चमकती। पर अगर अस गलत पलाटते त हैं जिन्देगी अन्तर “ब्याह कर कइ फस गा, यार!” बोलुण सुआ टेम ना लगता।



धाणि जुएली बुछ अणबण त मन मुटाव केहि बझई जोई भोई सकता, जीं रुपेई के खर्चा, कम करणे ढंग, शौरादी बाड़ी के जरूरत, गभुर भुण त पाइण, अपु जरूरत त अपु आत्माई हालत। सुआ जेई ब्याह केआं पेहले एन्हि बोकी के बार बोक विचार ना कते, पर उम्मीद जरूर रखते। पता जपल उम्मीद पूरी ना भुन्ति त मन मुटाव, अणबण भोई घेन्ति। अफसोस ई असु कि तपले असी पता ना लगता कि कीं कइ अपु लखि साथि मनाण। अस अपु मठडियारी तारिका जुए अपु लेहर किढ़णे या होरी मनाणे कोशिश कते। पर तेसे बेलि बि कोई फायदा न भुन्ता। पता अस उदास भोई कइ लेहरीण लगते त ग्या बि देन्ते। पर जेस जुए

हैं सात जन्मे लिए रिश्ता भोई गो असा, तेस ग्या दी कइ खारीखोटि शुणाण, केतु जायज असा, तेस बारे तुस धिक सोचीण दिए। अगर तुसी धाणि जुएली बछ कोई अणबण, गलतफैमी, या नराजगी असी त सुसुर करण जे यकी होरी जुए बोक विचार करे। बुहन दुतो उपदेश मनणे कोशिश करे।

1- अपु गलतफैमी त नराजगी सुआ चरे तकर मन अन्तर न रखे। तस सबेले सुलझाणे कोशिश करे। अगर गलतफैमी मन अन्तर सुआ रोज रखते त से तुं मन त रिश्ता बगाइ छता।

2- अपु जीवन साथी जुए बोक करणे टेम, सिदे मुद्दे पुठ बोक करे। होर खुल कइ बोक करे। तेस बताण दिए कि तुस की ठीक लगता, होर की नेई। की करणे बेलि तुसी कष्ट लगता, तेस बारे खुल कइ बोलिण दिए।

3- याद रखे कि तुं मकसद समस्याई हल असा, ना कि महाभारत खड करणे। त बोक कते टेम समस्या बारे बोक करे त तेस दूर करणे बारे ध्यान दिए। अपु जुएली या धाणि दोष किढ़णे बेलि समस्याई हल ना भोई सकतु। त कदी तेन्के कमीपेशी ना गिणाण।



4- अपु मने हालात बोलिण दिए। तेन्हि नियोकाइ कइ कोई फायदा नेई। अगर तुस खुश नेई त खुल कइ बोले। पर ध्यान रखे कि तुस सिर्फ अपु साथी जे बि बोलणे बराबर मौका दिए।

5- यक यक बोकी पुठ ई बोक करे। सुआ चीजे बारे यक साथ बोक करणे बेलि तुं ध्यान यक होरी गलती किढ़णे पुठ घेन्ता, ना कि समस्याई हल पुठ।

11

## ब्याह बुछ अणबण...

6- अकेले अन्तर बोक करे। सोबी के सामणी बोक करणे बेलि तुं ध्यान गडि घेन्ता त होरी के सामणी तुं बेज्जती बि भुन्ति।

7- ई नेई कि बोक करणे पता तुं गलतफैमी दूर भोई घेन्ति या तुं अणबण मुक घेन्ति। तीं भुण जे तुसी कोशिश करणे एन्ती। त तेस लिए तुसी योजना बणाण जरूरी असी।

8- बोक कते-कुते अगर तुसी लगतु कि तुं गलती भो, त तस अपु जीवन साथी अगर मनीण दिए। अपु रोभ बझई जुए मुकरे नउ, किस कि गन्दि मुशक कदी ना मुकती।

9- याद रखे कि अपु साथी जुए सुसुर रिश्ता रखण, बहेस जीतुण केआं खरु असु। त तुं बोक करणे मकसद "कोउं सही असा?" साबित करण नेई, बल्कि "कीं कइ अस अपु ब्याहे खुशी सम्हाड़ी रखते?" से असु।

ई बोलणे जरूरत नेई कि जपल तुस दुहि के रिश्ता पक्का भुन्ता, तपल यक अब्बल त ट्यारा टब्बर बणाता।

लेखक: षम्मा सिंह, स्रोत: फॉक्स ओन दा फैमिली

## मैं ट्यारा भाई



मैं भाई मठुड असा  
बोके कता से तोते ई  
भाई मैं राजा भो  
खांता मठा खंजै से।

मैं भाई न्यारा असा  
मठुड ई यक तारा भो  
मैं भाई उंचो असा  
से त राजे ई कुआ असा।

भाई मैं हसता  
कत अब्बल लगता से  
भाई मैं घीत लांता  
शिहिन सुआ देन्ता से

मैं भाई उंचो असा  
झणापे तेस घेण लगो असे  
मैं भाई सुना भो  
सोबी तीं खिलांता से

लेखिका: अक्षिता, कक्षा: पांचवी, रोल नं- पांच, स्कूल: कवास

## तुबारि मासिक पत्रिका

◆अस इ उम्मिद करुं लगो असे कि एण बाड़े रोज अन्तर सुआ मेहणु इस कम अन्तर साथोट देन्ते।

◆इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पढ़ूं जे त भाषाई सुहलियत करण जे इ पत्रिका शुरु किओ असी।

◆तुबारि यक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति गलती कडेण जे नेई छपाण लगो। अगर कोई ई सोचता बि त अस जिम्मेबार नेई।

◆छपाणे पेहले सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहिल बार पांगवाडि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिले, या घाटि मेहणु के साथोट ना मिले त तुबारि पत्रिका कदी बि बंद भुई सकती।

◆कोई चीज छपां असी या नेई छपां जे तुबारि संपादकीय टीम पुरा अधिकार असा।

◆अस किलाड केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपु सझाव और अर्टिकल्स रखूं जे सुविधा किओ असी।

◆अस सोबी पांगी मेहणु जे हात जोड कइ अनुरोध कते कि, तुस बि कोई अछा अर्टिकल, पुराणि या नोई कथा, कहावत, कविता, त नोई घीत (पांगवाड़ी अन्तर) लिख कइ छपां जे हेंघे दिए।

तुबारि संपादकीय टीम

☎ 9418431531

☎ 9418429574

☎ 9418329200

☎ 9418411199

☎ 9418904168

☎ 9459828290



मास्टर : आज तोउ चरे किस भु?

गभुर : बथ यक साईन बोर्ड पुठ लिखो थिउ।

मास्टर : साईन बोर्ड बेलिए चरे एणे की मतलब?

गभुर : तेस पुठ लिखो थिउ "अगर सकुल असा, मठे हंटे"।

हनी त सन्नी दुई कुआ बोकी लगो थिए

हनी: आज अउं स्कूल उंघ गा।.....

सन्नी: यार तुं सकूले मास्टर कत अब्बल असे, जे सकुल उंघण दी छते।

लेखिका: कृति, कक्षा: पांचवी, रोल नं: 1

# चुटकुले

